



UPA2017/137
Nuuk, 20.04.2017
Kelly Berthelsen

Uunga siunnersuut: Imaani avatangiisit illersorneqarnissaat pillugu Inatsisartut inatsisaat nr. xx, 2017-imeersoq.

(Inuit Ataqatigiit siullermeerinninnermut oqaaseqaataat)

Ullutsinnut naleqquttumik imaani avatangiisit illersorneqarnissaat pillugu inatsiseqalernissarput Inuit Ataqatigiinniit nuannaarutigaarput. Tassami inuiatut nammieernerujartuinnartilluta inuussutissarsiorfitta pingaarnarpaataat, tassa imaq - qangarsuaaniilli inuussuteqarfigisimasarput - paarilluassallugu suli annerujartuinnartumik pissutissaqarpugut. Taamaammatt qeqertanit avallerniit avammut 3 sòmilit tikillugit inatsisit nutarterneqarnissaat - tamatumalu saniatigut oqaluserisassami tulluuttumi - nunatta aningaasarsiornikkut oqartussaaffiani avammut 200 sòmiiinik avasitsigisumi danskit nakkutigissallugu pisussaaffigisaani malittarisassat piunasaqaatillu nutarterneqarnissaat Inuit Ataqatigiinniit nuannaarutigaarput. Aamma uumassusileqarfiit isiginiarneqarnissaat, miannersuussinnissaq kiisalu mingutsitsisup akiliisussaataitanissaa tunngavigalugit (§ 3) inatsisiliortoqarnera ilanngullugu nuannaarutigaarput.

Imartarujussuarput nakkutigisassaammatt mingutsitsisoqarnissaanut upalungaarsimaneq akikitsuunaviannikkaluq taamaattoq nappateqarfitta pingaarnersaata paarilluannnginnissaanut akissaqanngilagut. Annertuumillu mingutsitsisoqassappat naalagaaffeqatitsinnut salinermi ikiuteqqullugit saaffiginnittarnissarput pissusissamisoortutut isigaarput tassami danskit naalagaaffeqatigigallartillugit taakkuttaaq upalungaarsimanermut salinermullu suleqataanissaat pissusissamisuuginnarmat.

Kisiannii § 48 aamma 37-imi oqaatigineqarpoq kina imaluunniit kikkut mingutsitsisuusut paasineqarsinnaanngippat taava sineriammi mingutsitsivigineqartumi kommunalbestyrelsusut Naalakkersuisut saniatigut salinermut akisussaassasut. Ajoraluartumillu inatsisissatut siunnersuummut nassuiaatini siunnersuut pillugu kommunalbestyrelsit ataasiakkaat qanoq oqaaseqaateqarsimanersut - salisussatut pisussaaffilerneqarnissaminnut akuersinersut akuersinnginnersulluunniit - takusinnaanngilara arajutsiinnarsimannikkukku.

Kisianni qanorluunniit ikkaluarpat umiarsuit takornariariutit tikittartut amerlanerujartuinnartillugit taamalu ajutoortoqaratarsinnaanera ilimanarnerujartuinnartillugu kommunit naammattumik naleqquttumillu upalungaarsimanissaat saliisoqassagaluarpallu aningaasanik sillimmateqarnissaat pinngitsoornani qularnaartariaqassaaq.

Tassungalu atatillugu unioqqutitsisoqartillugu akiliisitsisarnissaq pillugu § 62-imi aalajangersakkat aamma isumaliutigeqqittariaqassagunarput tassanimi oqaatigineqarmat akiliisitsissutit nunatta karsianut tutsinneqassasut naak kommunalbestyrelsit ilanngullutik saliisussaataasutut aamma allassimagalu-artut. Tassunga tunngasut erseqqissumik aaqqinneqassasut Inuit Ataqtigiinni-it neriuutigaarput.

Aamma inatsisissatut siunnersuummi § 46-imi oqaatigineqarpoq umiarsuit imaani avatangiisit illersorneqarnissaannik inatsisinik unioqqutitsisimasut nunatsinnut tikeqqusaajunnaarsinneqarallarnissaannik Naalakkersuisut aalajangiisinnaatitaassasut. Tamanna soorunami immiini pissusissamisoorpoq. Kisianni nunatsinni umiarsualivinni umiarsuarnik kiveqqasunik peqarpoq. Taamaamat apereqqajaanngitsuunngilaq uagut nammineerluta nunatsinni umiarsuit inatsisitsinnik malinninnissaat qularnaarluarsinnaanngikkutsigu qanoq isilluta nunat allamiut umiarsuaat avatangiisinik unioqqutitsisimanersut unioqqutitsisimanninnersulluunniit naammaginartumik nakkutigisinnaassaneripput. Naatsorsuutigaara Naalakkersuisut tamatumuunakkut sillimmartaareersimasasut.

Inatsit nutartigaq, piunasaqaatinut nutaanut naleqqussagaq - avatangiisitigut aammalu politikikkut siunertanut nutaanut naapertuuttoq soorunami Inuit Ataqtigiinnit qujarupparput. Kisianni assersuutit taaneqartut takutippaat inatsisissatut siunnersuut sukumiisumik misissorneqartariaqartoq taamaam-mallu itinerusumik misissugassanngorlugu ataatsimiititalianut attuumssuteqar-tunut ingerlateqqinnissaa pissusissamisuussasoq.

Qujanaq.